

H

1624 5103

350-

LA VOIX

Publicque,

AV ROY.

g

Ex Libris Ant.

Boulacqin

1624.

1807

11

1807

11

1807

11

1807
11

LA VOIX
PUBLIQUE
AU ROY.

IL y a quelque temps, Sire; que l'on a
veu courir par Paris, & dans vostre
Cour, vn certain petit liuret, intitulé (Le
Mot à l'Aureille) comme s'il eust conte-
nu tous les mysterieux secrets de vostre
Estat, ce qui a rendu vn chacun desireux
d'en entendre la lecture; de sorte qu'il a
seruy d'entretien à toutes les bonnes
compagnies, parmy lesquelles chacun
s'est meslé d'en dire son opinion: En
quoy les iugemens se sont rencontrez
assez diuers.

Les vns soustenans que cest escrit n'e-
stoit remply que d'impostures; autres au
rebours qu'il ne falloit mettre la main à
la plume pour en raconter si peu; autres
que cest Escriptuain ne s'estoit amusé qu'à
depeindre les deffauts exterieurs du Sur-
intendant, sans coter les fautes qu'il
commet contre l'Estat; autres s'est omac-
quoiét contre cet escrit, sans en pouuoir

dire les raisons; autres assureoient qu'il y auoit assez de verité pour servir d'aduer-tissement au procez de la Vieuville. Mais tous se sont rencontrez & demeurez d'accord que ce n'auoit esté que la passion qui auoit animé cest autheur, lequel d'abord se fait assez cognoistre pour vn captif pensionnaire, que le despit de se voir biffé de dessus l'estat a mis aux châps pour declamer contre le Marquis, tout prest à chanter la palinodie, & de le louer hautement comme le plus parfait des hommes, au cas qu'on le veuille restablir & luy faire toucher finance, ainsi qu'il se peut facilement recueillir par la lecture de son discours.

C'est bien la verité, Sire, que la calomnie & la flatterie sont ordinairement les deux puissans fleaux qui persecutent & ruinent tous ceux qui sont esleuez aux grandes charges, & qui par diuers moyës sapent insensiblement leur fortune: la mesdisance enuieuse s'efforçant de noir-cir toutes leurs actions, & la complaisante flateuse avec laquelle on les chatoüille en leurs erreurs, est celle qui fait perir tous les iours la plus part des grands dans entre- s'effauts.

V

Qui se peut garentir de ces deux perilleux escucils, se peut dire heureux & sage tout ensemble. Le premier s'évite par vne suite de genereuses actions, lesquelles avec le temps r'ameinent les passions à la raison, & fait bouquer l'enuie, la vraye vertu n'estant sujette à s'estonner par le bruit d'un vaudeville. Et pour le second, l'homme ne s'y laisse surprendre, quand il a plus d'apprehension de faillir, que de presumption d'avoir bien fait.

Or ce que j'ay maintenant à représenter à V. M. n'est pas un discours de mesdisance, ny vne raillerie complaisante, c'est vne verité la plus importante, Sire, qui puisse estre aujourdhuy annoncée à un grand Roy, dans l'urgente necessité du reestablissement de ses affaires. Ce n'est pas aussi la pensèe d'un simple particulier mais celle de tous les gens de bien, & de tous les judicieux personnages de vostre Estat. En un mot, c'est la Voix Publique.

Chacun sçait, & l'experience a peu fait recognoistre à V. M. que tout le bonheur d'une Monarchie despend de la composition du Conseil du Prince; S'il a près de sa personne, ou dans l'administration de ses affaires des gens bien cen-

sez, d'experience solide, & de probité reconnue, assurement son regne est heureux, le corps de son Royaume s'affermir dans l'ordre, & la prosperité remplit ses subiets de biens, à la gloire du Prince & benediction du peuple. Si au rebours ceux qui sont recognus avoir basti leur fortune aux despens de leur Prince, & des ruines publiques, subsistent dans le credit, sans crainte d'estre recherchez, ny punis de leurs meffaits: Si les meschans s'y autorisent, & les ignorans y tiennēt les resnes du gouuernement, infailliblement le Monarque & la Monarchie se consomment dans leurs propres confusions; le peuple languit sous l'oppression; & la calamité generale donne courage aux voisins d'en proiection l'vsurpation, & d'en auancer la ruine.

La memoire des choses passees, Sire, peut faire ressouvenir V. M. si ceste these est veritable, ou non. Et pour luy faire cognoistre clairement que tous les malheurs qui ont affligé vostre Couronne ont pris leur source de ce deffaut, ie ne craindray de représenter succinctement aux yeux de V. M. les choses qu'elle a veu elle mesme durant ces annees der-

nières. Quasi quelques bons Peres luy ont quelquesfois persuadé, que les pechez, ou desobeyssances de ses subiets, auoient attiré de Dieu sur nos testes, & procuré les calamitez qui ont opprimé la France, tant du temps de la Ligue, que depuis le coup parricide qui a porté le Roy vostre pere au tombeau; on leur peut aussi alleguer, Sire, que l'infidelité & ignorance de ceux, auxquels V. M. auoit confié le maniment de ses affaires, y ont contribué beaucoup plus que les pechez de vos subiets, que la malice estrangere a sceu abuser de faux pretextes, à quoy mesme nostre foiblesse a consenti pour complaire à des dominations estrangeres, qui ont sceu d'autre costé astucieusement gagner les esprits de ceux auxquels V. M. s'est confié le plus.

Si tous ceux qui ont possédé l'honneur de vos bonnes graces, & entrepris l'administration de vos affaires, eussent eu les intentions droites, & autant pensé à vous seruir, qu'à establir leur fortune, assurément, Sire, V. M. n'auroit ressenty les desplaisirs qu'elle a receu, son Estat n'auroit esté desolé comme il est, ny le pauvre peuple souffert les miseres qu'ils

endurent encores aujour d'huy.

Permettez, Sire, que ie prenne vn peu les choses de plus loing, disons que Villeroÿ & le Chancelier Sillery avec leur fausse reputation de probité imaginaire, ont empoisonné la plus part des esprits de vostre Conseil, & par leur premiere conuiuence avec le Marquis d'Ancre, ont ietté les premiers fondemens de tous nos malheurs, chacun d'eux n'ayant pensé qu'à regner, ou à complaire a autrui pour regner, sans se soucier que deuiendroit V. M. ny la Royne vostre Mere, ny l'Estat, pourueu qu'ils subsistassent en credit, à quelque prix que ce fust, c'estoit le but de leur ambition, & comme chacun d'eux vouloit commander absolument, cela fut cause que ces trois ne purent durer longuement en bonne intelligence.

A ces trois succederent trois autres avec leurs supposts, lesquels au lieu de prendre exemple, sur le courant de la fortune de celuy qu'ils auoient fait tuer, firent au contraire cent fois pis, que ceux en la place desquels ils s'establirent.

A la verité le Marechal d'Ancre dissipa les finances de la Bastille avec le consentement

fentement de Villeroy & du Chancelier,
 à quoy Mangot, Barbin, & l'Euesque de
 Luçon ne résisterent pas comme ils de-
 uoient ; Puis sur la fin il persecuta les
 Grands du Royaume : mais Luyne non
 content d'auoir rauy les grandes richesses
 de cet estranger, il a volé à la face du
 Conseil, le plus beau du domaine de V.
 M. & tous les plus clairs deniers de vo-
 stre Espagne, & sans considerer le bien
 de vostre service, il s'est tout a faict ietté
 dans la faction d'Espagne pour s'appuyer
 contre la Roynie vostre Mere, s'estant si
 estroittemēt ligué avec l'Espagnol, qu'en
 sa faueur il a faict en sorte qu'on enuoya
 le Duc d'Angoulesme en Allemagne
 pour y faciliter les affaires d'Austriche:
 De plus nous auons abandonné tous les
 anciens alliez de ceste Couronne, inter-
 rompu l'intelligence durant quatre ans
 avec les Estats de Hollande, mis en non-
 chalance la conseruation des Suisses,
 consenty à la prise de Iuliers, du Palati-
 nat, de la Veltoline, mesprisé l'alliance
 avec l'Angleterre, & fomenté la guerre
 ciuile au milieu de vostre Royaume.

Non content de tout ce que dessus,
 pour retirer quelque argent qui estoit au

Mont de Pieté de Rome, il a de haute lutte reſtably les Ieſuites dans Paris, contre les formes ordinaires de la Juſtice, & notables Arreſts de voſtre Parlement. En vn mot le Mareſchal d'Ancre a troublé l'Eſtat, en attaquant quelques Seigneurs du Royaume, & Luyne pour s'agrandir a ſappé les loix fondamentales de la Monarchie, ayant ſi dignement ſeruy le Roy Catholique durant qu'il a gouuerné, que ſon Ambaſſadeur mandant des nouuelles à Bruxelles eſcriuit ces mots en ſa lettre, (los negocios de Francia van como lo deſeamos.) Et de fait l'Eſpagnol n'eult ſceu ſouhaitter autre choſe que ce que nous auons faiſt pour l'eſtabliſſement de ſes affaires, le tout au grand preiudice de celles de V. M. & de la Couronne.

Voila, Sire, comme les bons Conſeillers ont abuſé de voſtre bonté. Cependant ſi iamais pauvres creatures furent obligees à vn grand Prince, c'eſtoit Luyne & ſes freres. Chacun ſçait & la pluspart de la France a veu ceſte hiſtoire, & ſi V. M. daigne faire parcourir ſa memoire ſur tous leurs deportemens durant l'adminiſtration qu'ils ont eu de voſtre Roy-

aume, elle trouuera qu'il n'y eust iamais de plus ambitieux coquins, de plus ingrats seruiteurs, de plus hardis imposteurs, de plus signalez voleurs, & de plus perfides ministres, la memoire desquels deuroit estre execrable à la posterité, & maudite des viuans, afin de faire voir au monde que V. M. hait les meschans, & qu'elle a du ressentiment du mal qu'on luy fait.

C'est en vain, Sire, d'esperer qu'un grand Monarque puisse estre dignement seruy s'il ne punit les forfaitures de ses Ministres, & ne condamne la memoire des scelerats. Outre que le Prince & l'Estat s'en trouue mieux secouru; cela sert encore à contenir les esprits mal faisans en leur deuoir, l'experience faisant cognoistre que tel a exercé vne charge honorablement & en homme de bien sous vn Roy Iusticier, qui eust fait tout le rebours sous vn Monarque tres-clement. Ainsi vn Estat corrompu comme celuy de France a besoin d'exemple de punition, si on veut contenir les hommes en leur deuoir & refrener leur malice, autrement il n'y a rien de plus certain que tout continuera à aller de pis en pis.

A l'insolence de ces trois freres, Pui-
 sieux & le Chancelier ont succédé, l'un
 fol à porter marotte, & l'autre malicieux
 comme vn vieux singe, qui par bon-heur
 a eu plus de reputation à contrefaire
 l'homme de bien qu'il n'a eu de pruden-
 ce à le tesmoigner par effect, estant vne
 maxime infallible que iamais Palatin ne
 fut iudicieux. La multiplicité de ses
 actions sordides sont preuues suffisantes
 du naturel du personnage, qui n'a sceu sa-
 gement viure dans le monde, ny hono-
 rablement s'en retirer, quoy qu'il en ait
 eu toutes les occasions à souhait, & le
 pouuoir tout ensemble, s'il eust esté
 doué d'autant de preuoyance, que de
 felle auarice.

Cependant, Sire, vostre Estat a paty
 grandement par les exorbitantes fautes
 que telles sortes de gens ont commises,
 iusques là qu'il y a de la honte pour vo-
 stre Couronne de les mettre en lumiere.
 C'est pourquoy ie m'en tais pour pleurer
 les malheurs où ils ont plongé vostre
 Royaume, à quoy il est quasi comme im-
 possible de pouuoir remedier, sinon que
 vne grace speciale de Dieu, vigilance de
 V. M. & bons aduis des Ministres de l'E-
 stat.

J'ay estimé necessaire, Sire, de vous ramenteuoir toutes ces choses, afin qu'en les repassant par sa memoire, elle iuge plus facilement combien il importe d'establiir des personnes gens de bien, fidelles & capables dans son Conseil, puis que tant de malheurs sont arriuez & peuuent encores arriuer, si V. M. ny pouruoit par sa prudence.

C'est donc avec tres-grande raison, Sire, que j'ay proposé dès le commencement à V. M. que le bon-heur & la gloire d'un Prince depend de l'establissement d'un bon Conseil: cela estant ie la supplie tres-humblement de considerer ce qu'elle peut esperer maintenant de ses Conseillers, & auoir agreable que ie luy rapporte en ce discours qu'elle croyance on en a, & ce que i'en ay recueilly.

Vostre Conseil est à present composé de la Royne vostre Mere, des Cardinaux de la Rochefoucault & de Richelieu, du Connestable, du Garde des Seaux, & du Marquis de la Vieuille. Voila, Sire, les six personnes qui sont admises dans le secret de vos Conseils. Reste maintenant à représenter à V. M. comme les choses se passent, ce qu'on espere de la restaura-

tion des desordres, & ce que la Voix Publique dit de ces personages. Commençons par la Royne vostre Mere.

Chacun vous louë, Sire, d'auoir introduict ceste vertueuse Princeesse dans vostre Conseil, c'est vne action qui redonde à l'honneur de l'un & de l'autre, & vn tesmoignage d'amour & de iustice, dont le public se resioit, d'autant que de ceste bonne & necessaire intelligence depend la tranquillité du Royaume, & de ceste estroite vnion la roine de tous ceux qui voudroient se mesler de brouïller vostre Estat, ainsi qu'ont fait plusieurs, qui sous pretextes de vous seruir, ont semé de la diuision entre vos Maiestez pour s'emparer de vostre auctorité, & establir leurs affaires.

Nul ne doute, Sire, que V. M. n'aye du bon-heur de conferer avec la Royne sa Mere sur les choses importantes de son Estat; d'autant que l'experience qu'elle a de ce qui s'est passé, peut grandement seruir à la rencontre des occurrences des affaires presentes, & ce qui doit vous consoler le plus, c'est qu'il semble que vous ne pouuez auoir aucune deffiance de ceste Princeesse, estant certain qu'elle

ne peut se diuifer d'auec V. M. sa grandeur, son bon-heur, & son repos dependant de la prosperité & bonne conduite de vostre Estat. Elle n'en sçauroit trouuer ailleurs de plus affeurez, ny de plus honorables. Et d'autre-part V.M. ne se peut mieux fortier contre les bouillons que d'entretenir ceste sainte correspondance, laquelle ne peut estre trauersée que par des esprits malins & diables incarnez.

Quant au Cardinal de la Rochefoucault, c'est vn Prelat digne veritablement de grande consideration; car s'il fait, ou tollere le mal, on dit que ce n'est à mauuaise intention, son esprit & son corps n'allant qu'entant que les Peres le pouffent, employant toutes les forces de son ame, non aux affaires de vostre Royaume, mais bien au soin d'introduire par toutes vos villes vne fourmilliere de Conuens, au lieu des Eglises que feu son grand pere a ruinees: comme aussi à conuertir avec l'argent du Clergé, force Ministres, en compensation de tant de pauvres Catholiques que son pere a assommez durant les guerres ciuiles de la Religion.

Pour le Cardinal de Richelieu, les Courtisans le tiennent raffiné iusques à 22. carats, & les clair-voyans ont opinion que son naturel courageux l'engagera à bien faire pour auoir de la gloire : car estant habile & prudent, comme il est, il n'y a point d'apparence qu'il aille chercher autre appuy qu'en l'autorité legitime de V. M. ny autre suiet pour employer la grandeur de son esprit, que dans la bonne conduite de vos affaires : autrement tout le monde luy coureroit sus, & seroit de credité à iamais, qui est tout ce qu'il doit apprehender.

Quelques autres ont encores ceste esperance qu'estant issu d'un pere bon François, & qui comme fidele subiet a si dignement seruy Henry III. durant les furieuses bourrasques de la Ligue, il imitera un si braue caualier; & que sans s'arrester aux interests d'Espagne, ny des Cagots, il embrassera ceux de V. M. comme un autre Cardinal George d'Amboise, à fin de releuer cet estat menassé de toutes parts de ruynes euidentes, s'il n'y est genereusement, ierepe encore genereusement, & promptement remedie.

Les merites du Connestable l'ont mis
où il

où il est, ceux qui le haïssent ne luy veulent mal, que pour raison qu'il ne fut jamais dans la cabale Espagnole, son genereux courage luy faisant desirer tous les iours d'estre plus sourd qu'il n'est, tant il a à contre-cœur d'entendre les choses qui se passent si contraires à l'honneur de V.M. & reputation de son Estat: son iugement net, & l'experience que l'aage luy a acquis, luy donne vne grande cognoissance des affaires du Royaume. Que s'il auoit l'auctorité de remedier aux fautes qui se commettent, la France receuroit le secours qu'elle doit attendre d'un si grãd personnage, auquel il n'y a rien à souhaiter qu'une prolongation d'annees, à quoi plusieurs se persuadent que Monsieur d'Espernon mesmes ne refusera de ioindre ses vœux & prieres.

Le Garde des Sceaux a esté choisi du seul mouuement de V. M. C'est la verité, Sire, que chacun le tient pour homme plain de probité, d'integrité, & bien affectionné a vostre seruice, & auquel on peut appliquer ce que dit Salomon, (*Ab occurſu faciei cognoscitur vir sensatus*), il ne luy manque qu'un peu plus de courage & de hardiesse pour s'opposer à ce

qu'il voit de mal deuant ses yeux: Que si en cela il ne tesmoigne plus de vigueur, ce n'est pas qu'il n'en reçoive du desplaisir en l'ame, mais c'est qu'il preuoit que ses iustes efforts seront inutiles, tant que V. M. donnera vne entiere croyance aux conseils chimeriques de celuy qui s'ingere de vouloir gouverner tout seul.

Pour ce qui est de la personne du Marquis de la Vieuville, ou dit que plusieurs des siens s'efforcent de persuader au monde qu'il est tres-habile homme, mais il a ce malheur que personne ny veut adiouster foy, non plus qu'aux nouvelles de l'arriuee de la flotte d'Espagne, ou a beau publier son *committimus*, & raconter que c'est luy qui gouuerne tout, (ne per æquo) le public se fie aussi peu en sa conduite, qu'en la prud'hommie du fraizé Duret.

Il est vray, Sire, que quelques-vns soustiennent qu'il est copieux en belles conceptions, & que le Duc de Nevers & luy feroient les plus grands personnages de l'Europe, s'ils auoient la capacité de mettre leurs entreprises en execution: & que si le Marquis ne reussit bien aux siennes, ceste disgrâce ne luy procede que de ce

que tous les esprits sont dissipés par la meditation perpetuelles de ses intriques, dās lesquelles il oublie les solides, sa teste ressemblant à ces caualles des pays Meridionnaux qui ne conçoient que du vent ou à ces hommes incapables à la generation, lesquels meurent d'enuie d'embrasser leurs femmes, mais pour cela rien n'en reüssit au profit du mesnage. Voila en effect comme l'on depeint la Vieuville, & ne croy pas que du Montier le puisse crayonner de plus naïues couleurs.

Tous ces deffauts, Sire sont grands en la personne d'un Ministre confident, neantmoins en voicy encores d'autres plus considerables, & qu'on tient inseparables d'avec luy, Aflavoir vne agitation perpetuelle d'esprit, & un changement perpetuel de desseins, toutes ses resolutions n'ayants non plus d'arrest dans sa teste, que le vif argent dans le crisol d'un Orfeure, changeant ordinairement le soir ce qu'il aura resolu le matin, puis il retourne à ce qu'il a changé, ou faict des desseins tout nouveaux, avec des resolutions toutes nouvelles, allant ainsi de blanc en noir, & de noir en blāc, selon les diuerses conceptions qu'il se forme, ou

aduis qui luy agreent, ressemblant de cette façon à ceux qui ne guerissent iamais vn mal à cause de la multiplicité des remedes desquelles ils se seruent, pour n'en sçauoir l'usage d'un bon. Toutes lesquelles perilleuses vireuoltes, ne se peuvent faire, Sire, qu'avec vn notable preiudice de vos affaires, lesquelles requierent vn concert d'hommes solides & iudicieux; autrement l'Archuesque d'Aix auraraison de dire que vostre Estat ira tousiours sens dessus dessous, iusques à ce qu'il en ait la direction.

Venons maintenant aux quatre Secretaires d'Estat, il ne sera hors de propos d'en toucher vn mot, puis qu'ils sont du nombre des principaux Officiers du Royaume. C'est la verité qu'on tient qu'il n'y a rien à redire à leur affection, & quoy qu'ils soient trauezsez en la fonction de leurs charges, il est certain que s'ils auoient vn peu plus de liberté d'agir, ils releueroient les manquemens qu'on leur met sus, & feroient paroistre qu'ils ne sont si incapables comme on les accuse. Pour Bulion il remarque assez les fautes qui se commettent aussi bien que le Connestable, & quoy qu'il gronde entre les uents,

neantmoins il n'ose mordre de crainte que Tron on ne le visite.

Et d'autant que plusieurs declament à toutes heures contre les deportemens du Pere Sigueran , alleguans que c'est chose indecente à vn Confesseur de furerer continuellement parmy les Courtisans pour escumer des nouvelles. Je confesse, Sire, que ie me fusse volontiers exempté de parler de ce personnage, de crainte que la verité n'offense, ou que la flatterie ne desplaise à quelques vns: mais puis que l'office de Confesseur est au-iourd'huy vne condition la plus cabaliste du Royaume ; ie croy qu'il n'y a point d'offese d'en discourir vn mot en passant.

Le public desireroit, Sire, qu'il pleust à V. M. imiter pour ce regard la sagesse des Papes , & la prudence des Rois d'Espagne, lesquels se seruent bien de ces bons Peres, comme' espions pour descouurir par leur entremise les secrets d'autrui, mais ils se donnent bien garde de leur declarer les leur, afin de ne point dependre d'eux, ny qui puissent iouer le double c'est pourquoy iusques à present aucun Iesuite n'a eu l'honneur d'estre Confesseur de leurs saintetez, ny des Rois Ca-

tholiques, ny des Roynes, ny des Infants & Infantes. Et de fait par le traité du mariage d'Espagne avec l'Angleterre, on auoit estably vn Pere Dominiquain pour gouuerner la conscience de la Princesse.

Vostre Maiesté deuroit prendre exemple là dessus, Sire, & considerer les inconueniens, où la France est tombee, & où V. M. deut encore tomber en rendant la Confession du Loure hereditaire à la famille des Iesuites, comme l'Empire dans la maison d'Austriche; d'autre costé les Euesques & Prelats de vostre Royau- me deuroient aussi rougir de honte de tollerer qu'ils soient exclus de l'admini- stration de ce Sacrement en la personne de V. M. l'autorité de laquelle n'a esté at- taquée que par ceux de ceste Societé, les- quels pour brauer tout le Clergé, & se mettre en credit parmy les Princes Estrā- gers se veulent perpetuer la direction de vostre ame, de celle de la Royne Mere, de Monsieur, de Madame, des Princesses de Condé & de Comy, du Comte & Comtesse de Soissons, & de la pluspart des Seigneurs & Dames de vostre Cour; iusques là, qu'ils sont si friands de ce me- stier, que le Pere Arnoul & le Pere Siguc-

ran s'entregourmeroiët volontiers pour veoir qui depossederà son compagnon, afin d'entrer en credit pour cabaler les benefices , sur lesquels ils font tous les iours mille friponneries. Hé ! puis, Sire, escoutez prescher ces bons Peres sur le mespris de la Cour.

Le feu Roy Henry III. ayant choisi pour son Predicateur le sieur Rose Euesque de Senlis , au bout de quelques annees il desira qu'il fut aussi son Confesseur, surquoy ce Prelat s'excusa , remonstrant au Roy que du iour qu'il auroit ouy S. M. en confession, il falloit qu'il se desistast de la predication , d'autant qu'il croyoit estre mal seant dans l'esprit d'un Predicateur de declamer en chaire contre les vices, qu'il scait que son Souuerain luy a reuelé sous le Sceau de Confession. L'envie que les Iesuittes ont de continuer leurs cabales dans le Louure, les empeschera bien d'ensuiure ny d'imiter en ce point l'opinion d'un si sage Euesque, ie n'en veux dire d'auantage, me suffisant d'auoir representé comme les autres Princes se gouernent en cela, & d'auoir aduertty V. M. de prendre garde aux perils qui en peuuent arriuer,

Voila, Sire, tous les Ministres & principaux Officiers par les ressorts desquels vos affaires sont conduites aujourdhuy, ensemble le iugement que la Voix Publique faict de chacun d'eux en particulier. Et veritablement on croit que V. M. peut estre vtilement assistee de si grands personnages, pourueu que la confusion ne se mette parmy eux, & que vous empeschiez par vostre prudence que la charrette n'aille deuant les bœuf (ainsi que disent les bonnes gens des champs) c'est à dire que les plus impertinens ne gourmande les plus sages, car en ce cas il est impossible que vostre Conseil vous puisse dignement seruir.

Pour à quoy remedier il seroit tres à propos, Sire, que V. M. ordonnast tant pour la seureté de ses affaires, que pour la descharge de ses Ministres, que toutes les propositions qui se feront, ou resolutions qui se prendront, -ayent à passer par le concert & pluralité des aduis de vostre Conseil. La question est maintenant de sçauoir si les choses se gouvernent de la sorte, & ce qu'en dit la Voix Publique.

Le bruit est par tout, Sire, que la Vieuille fait le Marechal d'Ancre, le Luyne, le

ne, le Puisieux, & la Puisieufe tout ensemble, presumant tant de luy que dans vostre Conseil il entreprend de proposer, deliberer, & de resoudre tout; se faschant si les Secretaires rapportent, & si les autres ne concluent aux fins de cest vnique Senateur. Ainsi il ne faut qu'un fou, dit le prouerbe, pour troubler toute la feste.

Le plus grand malheur qui accompagne les Princes, Sire, c'est quand par vne trop grande confiance, ils ne prennent pas garde à la capacité de leurs fauorits, c'est quand ils ne scauent cognoistre la portee de leur ceruelle, dont s'ensuit ordinairement la ruine du maistre & du valet.

Et de verité, il n'y a rien ou la foiblesse d'un esprit paroisse si tost que dans le maniment des affaires publiques, le chariot du Soleil brule le ciel & la terre entre les mains de Phaëron, & fait produire toutes choses abondamment en celles de Phœbus, c'est pourquoy il faut auoir vne grande lumiere naturelle, vn iugement seur, & vne grande experience pour sagement tenir le timon d'un Estat, sur tout quand il est question de preuenir les inconueniens & desmesler prudemment les embusches qui se rencontrent dans

l'enueloppement des astuces du monde qui n'est doué de ce talent, il va à tastons dans les affaires, & bronche au milieu des deux chemins.

Souuenez-vous encore, Sire, qu'il importe a la gloire d'un grand Roy, d'auoir des Officiers bien censez & de grande reputation. C'est surquoy les voisins iettent plustost les yeux, que s'ils recognoissent que les Ministres soiēt peu capables, ils proiettent la dessus les fondemens & bons succez de leur machinations.

Que pourroit penler vn Ambassadeur si on luy rapportoit par plaisir ce que disoit il y a quelque iours vn certain palefrenier de Paris, lequel considerant son compagnon qui sangloit mal vne haquenée, eüst l'effronterie de luy reprocher tout baut, qui sangloit son cheual de trauers comme la ceruelle de la Vieuille. Et vn autre se plaignant de ne pouuoir trouuer logis dans Compiègne, on luy dit qu'il ne falloit aller que chez le Marquis, d'autant qu'il auoit tousiours force chambres vuides en la teste. Hé? quoy, Sire, V. M. ne croit-elle pas auoir interest en telles reparties & le public entierement?

Tenez aussi ceste maxime pour infail-
ble, Sire, de n'estre iamais bien seruy de
personnes qui n'ont autre Dieu que leurs
interests, autres meditations que leur
grandeur & autre plaisir que dans les in-
triques. La principale marque d'un bon
Ministre estant d'oublier tout a fait ses
passions & les affaires pour vacquer en-
tierement à celles de son Maistre. Sça-
chez, Sire, que le Marquis n'est pas de
ceste opinion, sa principale occupation
n'estant que de se vanger, & de s'establis-
à quelque prix que ce soit, ainsi que i'ef-
pere faire voir à V. M.

Quand il a trauaillé à l'exclusion du
Chancelier & de Puitieux, ce n'a esté que
pour empieter leur credit. Quand il a fait
chasser le Colonel ce n'a esté que pour
glisser des creatures aupres de Monsieur.
Ce qui l'a empesché d'y mettre le Duc
d'Angoulesme, c'est qu'il n'a sceu com-
ment le faire gouster à V. M. & de plus
il redoute la Royne vostre Mere qu'il
sçait auoir le naturel trop bon pour se tai-
re en vne telle occasion.

Interrogez Marcheulle, Sire, & vous
apprendrez ce que la Vieuille luy a pro-
posé autresfois pour le gagner, & en ou-

tre vous sçauuez qu'elle fidelité il y a en lui. A cela il dira qu'il faisoit cest intrigue avec Marcheulle pour d'estacher Monsieur d'auec le Colonel: mais il faut qu'il aduoüe aussi que les gens de bien ne font point telles vilanies, ny ayât que les fourbes comme luy, qui au ieu du Tarot se seruent de telles excuses, Sire, voicy bien d'autres fleurets dont il s'escrime.

Il fait sçauoir des merueilles à Monsieur le Prince par les Ducs d'Angoulesme & de Montmorency, luy promettant de le faire reuenir en Cour, quoy qu'il y aye (dit il) beaucoup de difficultez, à cause de l'extreme auersion de V. M. & mauuaise volonté que la Royne Mere luy porte.

N'est-ce pas là vn bon seruiteur qui declare les auersions de son Maistre, & qui se veut acquerir des amis à ses despens? Il a dit à des gens qu'il conserue Monsieur le Prince pour vn dernier refuge à sa fortune. Que s'il veoit ne pouuoir s'ayder de la Royne Mere, il s'aydera de Monsieur le Prince pour seruir à ses passions, & pour l'engager d'auantage à sa cordelle, il luy promet d'empescher que Monsieur se marie. Que s'il ne peut gagner

Monſieur, il donnera tant de deſſiances de luy au Roy, qu'il ſera contrainct de faire ce qu'il voudra.

Il a aſſeuré Madame la Comteſſe qu'il n'y auoit que la Royne Mere qui trauerſait le mariage de ſon fils, & d'autre part il a dans ſa teſte des deſſeins de faire reuenir Monſieur le Prince pour s'vnir avec Monſieur le Comte, & faire vn party.

Il aſſeure la Royne d'une paſſion extraordinaire à ſon ſeruiſſe, luy teſmoigne qu'il veut dependre d'elle plus que de perſonne du Royaume, afin de ſe pouoir appuyer de ſon authorité au cas qu'elle euſt des enfans, cependant Dieu ſçait quels pacquets il luy a autresfois rendus, & comme il l'a ſert à plats couuerts.

Que ne fait il point, Sire, pour faindre de vouloir gagner les bonnes graces de la Royne Mere, laquelle neantmoins il eſt bien aiſe d'imputer le blaſme du tort qu'il fait à autrui, & de s'en ſeruir pour faire ombre à Monſieur le Prince, & au bout de là quels mauuais offices ne luy rend il pas? par les meſmes voyes?

En apres il proiette encore vn autre corde pour ſon arc, qui eſt de reſtablir le Pere Arnoul, & de donner les affaires

estrangeres à quelqu'un à sa poste, l'un dit-il, pour vous tenir par la conscience & l'autre pour posseder l'oreille secrette de V. M.

Telles ruses ne sont-elles pas du diable, sera-il dit que le premier Roy de la Chrestienté se serue d'une personne qui n'a autre but que les propres interests, autre sagesse que celle qu'il emprunte de la teste de Loyeuse, autre espee que celle des Vvarden, ny autre conscience que celle, avec laquelle son beau-pere a administré & administre encore vos Finances.

Sire, ouurez les yeux, on meritte quelquefois vne bonne renommee par soy-mesme, & quelquefois aussi on ne laisse pas d'estre deschiré en sa reputation par les faits d'autrui. Tout le monde tremble d'apprehension quand on considere qu'un feu esceruelé tient le gouvainail de vostre Estat.

Souvenez-vous, Sire, que trois mois deuant que vous luy fissiez cest honneur de l'admettre dans l'employ de vos affaires, vous luy fistes manger du foin & de l'avoine fricassez dans la poisse, comme aliment propre aux cheuaux comme luy. Escoutez le mot à l'Aureille, vous y re-

marquerez les façons ridicules de negocier, confiderez les actions, faites vous conter qu'elle estoit l'humeur de son pere, qui ne porta iamaïs pour espee, non plus que son fils, qu'un couteau tranchant des deux costez.

Ce n'est pas iusques à vos Comediens, Sire, qui ne dient que les deportemens du Marquis sont capables de fournir d'estoffes pour illustrer toutes leurs Comedies. Pantalon estant allé il y a quatre mois trouver le Surintendant pour luy faire signer vne Ordonnance de quelque somme que V. M. auoit donné à sa compagnie, d'abord que le Marquis le veid entrer dans sa chambre, vne Mathurina-de le saisit si soudain, que sans dire gare, il se mit à faire mille Pantalonnades. Le seigneur Pantalon tout au rebours se met sur sa bonne mine, & s'approchant de la Vieuville avec un pas plein de gravité, luy dit gracieusement en luy presentant son papier (Seignore Marqueze V. S. Illustrissima a fatto il mio officio, adesso yo la supplico di fare il suo y che voglia firmare la mia Ordonnança.) Ceste harangue fit rire un chacun, & si le Colonel d'Ornano y eust esté, il eust esgayé l'as-

peſt de ſa froide mine pour en rire avec les autr

Iugez, Sire, iuſques où paſſent les infirmittez de voſtre Surintendant, & ſi tous ces contes ridicules ſe peuvent faire du prindipal Miniſtre de voſtre Eſtat, ſans que cela redonde ſur V. M. Et combien il eſt important de n'admettre dans le Conſeil que des gens tous faiçts.

Les Medecins tiennent pour maxime, que les experiences en perſonnes ſignalees ſont tres dangereuſes; de meſme eſt il tres-dangereux, Sire, de confier le gouvernement de l'Eſtat, à vne perſonne qui fait ſes apprentiſſages aux deſpens de V. M. & de voſtre authorité. La reputation eſt celle qui doit promouuoit aux charges ceux que les Princes deſirent employer. La Voix Publique leur doit ſeruir de guide, elle ne trompe iamais, d'autant que nul ne la peut corrompre.

Trois qualitez principales ſont requiſes à vn homme d'Eſtat, à ſçauoir la conſcience, le courage, & la prudence. Hé ! quelle fidelité vn Prince doit-il attendre d'une perſonne ſans conſcience, qu'elle iuſtice en peuuent eſperer les ſubiets, & vn homme ardent à ſon intereſt, n'eſt-il pas capable de

ble de s'engager en toutes sortes de meschancetez, principalement quand il estime ses artifices assez grands pour desguiser ses malices à son Maistre.

Tout de mesme avec quelle fermeté vn homme sans courage, pourra-il soutenir l'auctorité d'un Roy, quand son imagination se forgera l'ombre d'un peril qui n'a point de corps ? les cornes d'un limaçon estans quelquesfois capables de le diuertir d'un genereux conseil, pour embrasser celuy que la timidité luy persuadera estre le plus commode.

Combien, Sire, doit-on apprehender les perilleux qui proquo, de ceux qui n'ont aucune experience, que s'ils sont dangereux en Medecine, ils le sont encores d'avantage en matiere d'Estat, ou ordinairement il n'est pas permis de faillir deux fois.

Or est-il que vostre Surintendant, Sire, n'ayant ny conscience ny courage, ny prudence, quels services en peut esperer V. M. ny vostre peuple dans les importantes affaires qu'il est besoin de negocier à presēt, pour restablir les desordres du dedans & du dehors, qui menassent euidēment vostre Royaume de grands mal-

heurs, s'il n'y est genereusement & prudemment pourueu?

Et pour monstrier, Sire, que ce discours n'a aucune animosité particuliere contre le Marquis de la Viennille, sinon vne iuste crainte que son imprudence ne porte vostre authorité & vostre Estat à vne derniere ruine, que V. M. considere s'il luy plaist ce qu'il a faict pour son service depuis qu'il est dans le maniment des affaires.

Tous les desordres du dedans du Royaume sont encores en mesme confusion qu'ils estoient par cy deuant, voire beaucoup plus grand, s'empirans tous les iours par les longueurs, perte de temps & remises que l'on y apporte, vostre peuple est plus surchargé de tailles à present que l'an passé. Les volleries se commettent plus impunement dans l'Espagne que par cy-deuant, le beau-pere & le gendre avec tous leurs commis, s'entre donnans l'esteuf l'un à l'autre. La iustice s'administre à l'ordinaire, vostre gendarmerie est aussi mal payee qu'elle souloit: on n'a point chastié non plus aucun de ceux qui vous ont trahy & ruiné vos affaires. Qu'à donc fait le Marquis, Sire, il dira possible

qu'il a chassé deux Ministres, l'un fou, & l'autre meschant, mais il se gardera bien de dire qu'il tient leur place, & que luy & Beaumarchais font tout ce que faisoient Puisieux & le Chancelier, voire en un seul mois, desrobans eux deux autant d'argent à V. M. que les deux autres en ont volé en leur vie. Qu'il ne se vante pas, Sire, du bon mesnage de vos finances: car si pour la mine il a espargné d'un costé, on luy fera voir qu'il a tres bien sceu faire faire son compte de l'autre.

Sire, que V. M. preste seulement l'oreille, & elle entendra d'estranges choses sur ce sujet, qu'elle ouvre les yeux & elle verra de quoy faire pendre vne vingtaine de Financiers, sans comprendre le Filou. Le Marquis a si grand peur qu'on les recherche qu'il desploye tous ses artifices pour empescher l'enuie qui en pourroit venir à V. M. Et c'est pouquoy il voudroit bien introduire le Pere Arnoul pour vostre Confesseur, Sire, à cause qu'il est grand confident de Beaumarchais, esperant par ceste voye, garantir son beau-pere de l'apprehension qu'il a d'une confession generale.

Comment a-il sceu finement estouffer

la vollerie qui auoit esté faite sur la garnison de Mets? Ceste griuelee en pouuoit bien descouurir d'autres, c'est pourquoy on a couru au deuant par derriere, en satisfaisant promptement les interressez, & ainsi la punition de ce vol s'en est allee en fumee.

Qu'à-on fait, Sire, des propositions de Iuuigny & de Bourgoin qui crient tous iours ouuertement; sont-ils escoutez?

Les artifices d'estournent toutes bonnes choses: aussile Marquis se vante que quelque dessein qu'aye V. M. il se fait fort que s'il ne la destourne en vn iour; qu'il en viendra à bout en deux.

Qui a escludé dès le commencement la recherche du Chancelier, sinon la science que la Vieuille a, que son beau pere est meslé dans les vols qui se sont faiçts de vos finances? Et de faiçt, Sire, ie soustiens que Beaumarchais & la Vieuille ont desia volé plus de six cens mille escus à V. M. le ne dis pas des millions comme d'aucuns, ie ne parle que de ce que ie sçay, estant tres-vray qu'ils les ont pris, y ayans plus de trois Officiers de qualité qui se soubsmettront à perdre la vie, s'ils ne le verifient. Et de faiçt si iamais V. M. va à la

chasse aux larrons : elle verra qu'on luy en apportera les preuues toutes claires.

Il est constant que Puisieux a eu par cy-deuant vingt mille escus des Holandois pour estre payez du secours que V. M. leur donna l'annee derniere. La Vieuille l'a desia surpassé en ce poinct : car il est vray , & le sçay d'un homme qui entend le Flamand comme le François qui les a ouy discourir entr'eux , qu'il falloit interesser le Surintendant afin d'estre bien payez. Je ne sçay pas au certain ce qu'ils luy donnent : mais ie sçay fort bien qu'il passe quarante mil escus tous les ans. Et cela a esté descouuert par vne voye merueilleuse.

Il n'y a lieu, Sire, ou les gens de biens soient plus requis qu'au maniment des Finances, par ce que de là viennent les sources des larcins qui vous sont faicts, & toutes les oppressions que souffre vostre pauvre peuple.

Pour vos intendants, Sire, on les tient pour tres-hardis volleurs, il semble que la preuve en soit aysee, ayans desia esté chassez pour tels, & restablis pour la mesme cause, que si Duret s'y est maintenu, on peut attribuer ce bon-heur au thesor de son innocence.

Quand à celuy que V. M. y a mis, il a tant d'enuie de monter d'un degré qu'il n'y a rien qu'il ne face pour s'agrandir.

Le Controllleur est fort bon personnage, nul ne luy peut desnier ceste qualité: mais ie m'asseure qu'il accordera qu'il y a quelquefois grande difference entre un homme de bien, & le plus habile homme du monde.

Que si on dit que la direction deuroit suppleer à ces deffauts, la Voix Publique dit qu'il semble qu'elle ne soit establie que pour approuver toutes sorte de mauvaises affaires, & non pour en représenter les inconueniens, ny ayant personne de ceux qui en sont qui ne craigne de témoigner qu'il est homme de bien, de peur que le President Cheualier ne prenne sa place au prix d'une infame denonciation contre une personne qui est aussi perdue d'honneur que luy.

Mais quoy, entre Chancelier & Cheualier il y a de la rhyme, Sire, & si V. M. veut approfondir la recherche de leurs deportemens, elle y trouuera encore de la raison, & de plus la confiscation de l'un sera capable de fournir à la dépence des fortifications de vos places frontieres: &

celle de l'autre aux frais de la leuee de cinquante mille hommes; ces deux saintes personnes estans riches de plus de trois millions d'or.

Si V. M. veut joindre la chambre ardente (qui se deuroit nommer chambre de charité) elle recouvrera finances pour faire la guerre deux ans. Tout cela est de Justice, Sire, car il vaut mieux rechercher ceux qui ont volé vos thresors, & qui ont entre leurs mains tout l'argent de la France, que de surcharger le pauvre peuple qui à peine peut respirer. Mais la question est maintenant si vostre Surintendant & son beau-pere agreeront ceste sainte inquisition?

Pour monstrier que non, & que Beaumarchais craint l'examen de sa conscience, il ne faut qu'entendre ceste petite histoire. Bardin estant alitté d'une grande maladie, il eust vne vision durant les ardeurs de sa fieure, & luy sembla voir la Vierge Marie qui luy disoit, mon enfant si tu estre guery & sauué, dis à ton Maistre qu'il fasse restitution de ce qu'il a volé. Beaumarchais venant visiter Bardin, il ne manqua de luy rapporter ce qu'il auoit ouy de la Mere de Dieu. Ceste harangue

despleut si fort au beau-pere de la Vieuville, qu'il ne se peust contenir de dire à Bardin, mon amy vous estes vn badin sçachez que la Vierge Marie ne se mesle pas de nos affaires, pensez à vous guerir & ne refuez plus.

Ainsi se gouernent ceux qui veulent mourir riches; cependant, Sire, vous portez le nom de Iuste. Hé! y a-il rien de plus iuste que de faire rēdre gorge à des sangsuës qui se sont gonflées du sang le plus pur de vos subiets? Que V. M. considere qu'il n'y a auioird'huy Financier qui ne viue en Seigneur, & qui ne soit meublé en Prince: la pluspart d'entr'eux pour s'exempter du gibet s'estans alliez aux plus illustres maisōs de vostre Royaume.

N'est-ce pas chose horrible de voir vn lacquet, auoir espousé la niepce du Duc Mayenne? la fille de Feydeau le Comte du Lude? celle de Beaumarchais, le Mareschal de Vitry? celles de Montmor, le fils du Mareschal de Themines? celles de Herbault, les Comtes de Palluau, de Bury, & Marquis du Sel? celles de Fabry, le sieur de Pampadour? Quoy plus, vn Commis de l'Espargne a donné sa fille au Marquis de Mont-rauel avec cent mil escus.

cus. Villautrais qu'on croyoit deuoit estre pendu apres auoir desrobé vn million au siege de Montpellier, a marié sa fille au peneu du Cardinal de la Rochefoucaut pour s'appuyer de l'escarlatte; & ainsi d'infinis autres, les enfans desquels brauent l'ancienne Noblesse, de maniere que la science de bien desrober est l'vniue chemin de s'anoblir auourd'huy en France.

C'est à tel abus que la Vieuille deuroit remedier, s'il desiroit vtilement seruir vostre Estat, & en cela il feroit vne action plus glorieuse que celle qu'il fit il y a cinq mois à vne personne qui s'alla plaindre à luy touchant vne action.

Vn certain quidam ayant par Arrest du Conseil obtenu l'adiudication d'vne ferme, & le Greffier ne luy voulant deliurer son Arrest, qu'il n'eust mil escus pour son vin, ils tomberent à la fin comme d'accord à cinq cens escus. Le fermier neantmoins s'alla plaindre à la Vieuille de ceste extorsion, luy confessant qu'il luy faschoit fort de bailler vne telle somme, mais qu'il donneroit franchement quatre cens escus audit Greffier, lesquels il luy auoit desia plusieurs fois offerts. Le Su-

intendant promet à cest homme qu'il luy feroit faire raison, disant à ce fermier qu'il luy mist entre les mains les quatre cens escus qu'il auoit offert, ce qui fut fait & aussi tost le Marquis enuoya commander au Greffier d'apporter l'Arrest en question deuëment expédié. Ainsi la Vieuille ayant l'argent & l'Arrest, en presence des deux parties, il deliura luy mesme l'Arrest au Fermier & prit douze pistolles qu'il bailla au Greffier pour les expéditions. Et quant au surplus de ladite somme de quatre cens escus, il le retint; quelques-vns asseurent qu'il le porta à V. M. luy disant pour faire le bon valet, qu'il auoit gagné cest argent par son industrie, vous sçauiez si cela est vray. Cependant considerez, Sire, si ceste action est ny honorable ny de Iustice. Vn homme bien censé eut fait rendre l'Arrest au Fermier gratis, & pour l'extorsion enuoyé le Greffier en vn cul de fosse, ou interdit de sa charge, & puis le public admirera l'esprit de ce sage Surintendant?

Sçachez, Sire, qu'il n'y a mestier au monde si aisé à apprendre que celuy des finances, en dix iours vn homme y est Docteur tout le secret n'est que d'égaliser la despen-

ce à la recepte, & d'empescher que son Maistre ne tombe dans la necessité d'avoir recours aux moyēs extraordinaires. Tout bon Oeconome sçait cela, vos Tresoriers de l'Espargne en sçauent mieux l'vsage pour eux, que pour vous. Herbault qui n'est pas grand personnage aux affaires d'Estat, a fait voir qu'il estoit tres-habile homme dans le calcul, il ne faut estre que hardy à prendre, & effronté à refuser, pour deuenir en peu de temps bon Financier.

Non, non, perdez ceste croyance, Sire, que vostre Surintendant face mieux vos affaires que les siennes, si cela estoit il n'y auroit pas sept mois que deux Flaments Orfeures de la vallee de Misere, sont continuellement occupez à graver seulemēt ses armoiries sur vn nombre incroyable de grands vases qu'il a fait faire, ny ayant rien de plus certain qu'il mettra plus d'argent dans ses coffres, (que dans vostre Bastille, le monde sçait assez qu'il n'a point la capacité de Suilly, ny la probité de Champigny, ny la fidelité de du Hallier, ny le courage de Schomberg, que Monsieur le Prince estime seul capable de bien seruir V. M. à sa mode.

Qu'ainſi ne ſoit, Sire, voyons les grands profits que la Vieuville a faits à V. M. il a retranché les penſions, le moindre de vos Officiers pouuoit faire cela, appuyé de voſtre autorité, il ne faut faire qu'un traitt de plume : mais eſpluchons le reſte de ſon bon meſnage. La Bretagne a voulu achepter aux deſpens de la Prouince le marquiſat de Bel-Iſle, moyennant douze cens mil liures, à condition d'en iouyr trois annees; au bout deſquelles ceſte terre retourneroit à la Couronne. Voſtre Surintendant l'a empeſché, & au rebours il vous veut faire achepter le Comté d'Allet huit cens mil liures des deniers de voſtre Eſpargne, à deſſein de s'accommoder de ceſte piece. Les Oiſſeurs de Paris pourſuiuent de faire baſtir le Pont au Change de pierre de taille à leurs deſpēs, le marquis ne le trouue pas bon, & ainſi de mille autres propositions qui ſe paſſent dans voſtre Royaume.

On auoit eu eſperance que l'admiſſion du Cardinal de Richelieu dans voſtre Conſeil donneroit quelque facilité pour trouuer les expediens conuenables de remedier à tous ces maux, & de fait le Chancelier ſçachant ſa promotion dit à ſon fils

que la porte estoit fermee à leur reſtabliſſement, & qu'il auoit predict plus d'un an auant ſa diſgrace que les affaires de V. M. tomberoiēt entre ſes mains pour n'auoir iamais veu hōme ſi toſt fait que ceſtuy là.

Cependant depuis qu'il eſt au Conſeil de V. M. on ne remarque pas que les choſes y aillent beaucoup mieux: ſeroit il bien poſſible qu'il fuſt deuenu ſi aueugle que de ne point veoir les impertinences qui ſe paſſent? contribueroit-il bien aſſi- uement à de ſi perilleux pas de clerc? ou bien ſi pour n'irriter les Fees il acquieſce paſſiuement à ces deſordres prenant la qualité de Pere Souffrant, quoy qu'il n'en aye point le nom.

Neantmoins eſtant bon Theologien, comme il a paru autresfois ſur le banc de Sorbonne, dont il eſt maintenant le chef, il ne peut ignorer qu'une obmiſſion de choſe deuë n'equipole à vne commiſſion de choſe deffenduë, & liſant ces mots de ſainct Paul (Corde creditur ad iuſtitiam, ore autem fit confeſſio ad ſalutem) il faut qu'il aduouë qu'on n'eſt pas quitte deuāt Dieu & deuant ſon Prince d'auoir des bons ſentimens, ſi on ne les faiſt cognoiſtre publiquemēt, ainſi qu'on y eſt obligé.

Ceux qui publient sa probité & son courage, & qui disent que son zele est si grand qu'il mourroit volōtiers pour rendre quelque signalé service à V. M. & à l'Estat, adioustēt aussi qu'il ne veut servir dans le Conseil que conformemēt à l'entree qu'il y a fait par vostre commandement, qu'il est homme de compagnie, & qu'il veut viure en societé avec tous.

A cela, Sire, ie responds qu'il y a de la contrariété: car comme pourra-il servir V. M. sans contredire à tant de propositions pernicieuses qui se font contre vostre service? Et comment y contredira il, si pour viure en societé, il apprehende de desplaire à ceux qui ont plus de credit que luy? ie le prie qu'il trouue bon que ie luy die icy qu'il est en estat de ne desirer que l'honneur, & qu'il n'en peut meritte en se laissant aller aux passions du tiers & du quart.

Au reste, il se trompe grandement s'il croit que la Vieuille l'en estime d'avantage pour cela, il faut que le Cardinal sçache que le Surintendant le craint comme le diable, & le hait comme la mort, le deschirant secretement par tout comme son capital ennemy. C'est pourquoy les

Courtisans Speculatifs s'estonnent que le Marquis ait consenty qu'il fust admis dās le secret, attendu qu'un de ses confidens a dit à plusieurs qu'il cognoissoit qu'en certain sens, le Cardinal estoit la dernière personne qu'il deuoit desirer dans le Conseil : mais qu'il auoit esté contraint de le faire ainsi, pour le grand fais des affaires, & par la haine publique, laquelle il a creu estourdir par sa reputation pour vn tēps, pendāt lequel il pouuoit recercher quelques autres inuentions pour subsister.

Je sçay encores que la Vieuille deschargeant son cœur à vne personne de grande qualité luy a dit qu'il recognoissoit que le Cardinal de Richelieu auoit de grands talens, & que ce qui l'affligeoit le plus estoit qu'il ne pouuoit trouuer le moyen de le gagner: de sorte qu'il luy estoit impossible de s'asseurer de luy ; mais qu'il auoit mille moyēs d'arrester ses progresz.

Qu'il empescheroit bien que V. M. ne goustast son esprit, luy disant qu'il estoit Royne Mere, & vous donnant quand il voudra ombre de l'affection de ceste Princesse enuers Montreur, ou faisant reuenir Monsieur le Prince en Cour pour l'opposer à la Royne ; iusques là qu'il s'est

7 vanté à vn Duc il n'y a pas long temps, qu'il auoit vn ascendant sur vostre esprit iusqu'à ce point, que quand il voudroit il mettroit la Royne Mere aussi mal avec V. M. & Monsieur le Prince aussi bien qu'il ait iamais esté.

Bref, Sire, il pense cōme vn second Mitridatte aſſeurer sa vie dās le poison, c'est à dire dans la finesse & souplesse de ses rours. Que si ceste haine continuë, cōme il desmord iamais, le Cardinal doit faire estat de se voir bien tost reduit au nombre des ieunes Medecins qui chomment faute d'employ.

Voila comme le Marquis traite tous ceux qu'il haït, estat d'vne humeur si mordante, qu'il faut qu'il se mange soy-mesme, s'il ne deschire les autres, ne pouuant souffrir ceux qui remarquent ses defauts, & de là vient la haine qu'il porte au Mareſchal de Bassompierre, à cause qu'il estalle trop publiquement ses impertinences. Ainsi il n'est pas vostre Ministre, Sire, mais bien celui de ses passions & intereſts, mesprisant toutes les affaires generales pour vacquer aux intrigues, qui n'ont autre but que de faire paroistre noir ce qui est blanc pour se maintenir au preiudice de tout le monde.

S'il y

S'il y eust iamais esprit bourru, fou, & mal-faisant, c'est celuy du Marquis. Que si l'on veut prendre la peine de parcourir sur les deportemens de sa vie, on trouuera qu'il a donné mille afflictions à sa mere, & qu'il a forcé son pere à se despoüiller de ses charges pour l'en reuestir; Qu'il a mis sens dessus dessous la maison de Nevers, de laquelle luy & son pere ont tiré tout leur honneur & aduancement; avec quelle lascheté a il laissé perdre la Citadelle de Meziere? Quel artifice plus noir se peut on imaginer que celuy qu'il a fait au Comte de Schoenberg, en faisant semblât d'estre son intime amy, à fin de mieux persuader V. M. que tous les rapports qu'il faisoit de luy estoient veritables, bien que la verité n'aye encores iamais sorty de sa bouche.

Semblable tour ail ioué au Chancelier & à Puisieux, ne s'estant au commencement lié en apparence avec eux à autre intention que pour les perdre: & la principale methode qu'il tient pour ruynier les hommes, est d'attirer des mouchards qui luy viennent dire avec grand mystere quelques sornettes à l'aureille, puis il fait semblant à V. M. qu'il descouvre toutes

les cabales de ceux auxquels il veut nuire, ou auxquels il veut casser les os, ainsi que disoit le Pere Arnoul quand il auoit rendu vn mauuais office à quelqu'un.

Soudain qu'il veit les choses disposees à chasser le Chancelier, il fit sa brigue, comme il fait encores, pour faire tomber les Sceaux au President le Iay, ce que ne luy ayant reüssi, il essaya de le ietter dans vostre Cõseil. Il a fait aussi tous ses efforts pour y faire entrer le Duc d'Angoulesme sous diuers pretextes.

N'a il pas faict mille faux rapports du Colonel d'Ornano, à dessein de le faire chasser, & par ce moyen mettre pres de Monsieur quelques vns à sa poste, comme le Duc d'Angoulesme, le General des Galleres, le Marquis de Raigny, le Baron du Tour, Ioyeuse, ou autres de sa confidence. Combien de proiets s'est il forgé pour pratiquer quelque alliance, à fin d'agrandir sa maison. Il a proposé de donner sa fille au fils dudit Duc, il l'auoit voulu donner auparauant au fils du Marechal de Crequy, mais ce dessein fut aussi tost estouffé que né dans son esprit. Du depuis il a pensé faire alliance avec le Marquis Desportes pour s'appuyer des Ducs

de Montmorency & d'Vzez, en quoy il n'a peu non plus trouuer son compte à sa fantaisie.

Il n'y a Estat en France sur lequel il ne iette les yeux. Il auoit mis son coussinet sur la Lieutenance de Bretagne & Gouvernement de Blauet, ce qu'il eust faict reussir si le Duc de Brissac y eust voulu entendre. Il a pressé V.M. de recompenser Sedã pour s'y establir. Il a voulu vous faire achepter la principauté de Chasteau Regnault quatre cens mil escus, à mesme intention. Il a faict susciter des plaintes cõtre le sieur de Palaiseau pour luy oster Calais. Cependant, Sire, on a remarqué que le feu Roy ne voulut iamais donner aucun Gouvernement de forteresse au Duc de Suilly, d'autant qu'il est perilleux de conférer des places frontieres à ceux qui ont le maniement de vostre bourse. Il a voulu auoir la charge de General des Galleres, mais l'apprehension qu'il a eu que le Duc de Guise ne le traittast à la mode du Secretaire qu'il fit razer, l'en a degousté. Il a vne grande passion d'auoir l'Estat d'Admiral, ainsi que le Duc d'Angoulesme l'a faict entendre à plusieurs, & mesme au Duc de Guise & au Grand

Prieur entre les mains de qui ceste charge seroit beaucoup mieux qu'en celles d'un homme de telle farine, qui en est du tout incapable, & qui n'y pense que pour s'asseurer d'un cheual de bois pour transporter les volleries de son beau-pere & les siennes. Il a pensé à la Lieutenance de Normandie, & aux places du Colonel; mais il apprehende qu'on ne voye trop clairement qu'il a voulu plumer ce corbeau pour se reuestir de ses plumes.

Vn iour il cabale avec Monsieur le Prince, vn autre iour il donne esperance à Madame la Comtesse qu'il favorisera ses hault-pensiers; puis apres il la gourmande selon ses quintes & caprices iournalieres. Tantost il promet à Monsieur le Comte des merueilles, & en derriere se mocque de ce genereux Prince qui a si dignement seruy V.M. deuant la Rochelle, où il a tesmoigné & tous les siens, de quel zele & affection il est porté au bien de vos affaires. Cependât la Vieuille n'a pas trouué bon ce que ce ieune reietton du sang Royal ait aucun employ en vos armées.

Il a esté si impudent de dire à vn sien-confidēt qu'il pourroit bien estre vn iour grand Marechal des logis, pour marquer

le Bois de Vincennes pour Palais à Monsieur.

Pour endormir le Parlement, il promet à ces Messieurs au voyage qu'ils firent à Compiègne, qu'il ne se passera aucune chose, dont il ne leur rende compte: mais ils ne doutent pas que ce compte sera aussi fidele que ceux que son beau-pere a rendu à la Chambre.

Voila comme sa vie n'est qu'un dessein perpetuel d'intrigues, qui n'a autre fin que de nuire à vn chacun, & de reculer ceux qui peuvent mieux servir V. M. que luy, estant de la nature des diables qui destruisent & n'edifient rien, ou des aspics qui enueniment ce qu'ils touchent, & mordent tout le monde: Si on peut trouuer sa nourrice, ie veux qu'on me fasse porter la barbe à la Filouse, si elle ne tesmoigne que la Viewuille n'eust pas plustost des dents qu'il mordoit en la tétant.

Mais ce qui est le plus abominable de tout pour le bien de vos affaires, Sire, c'est qu'il se veut attribuer vostre oreille tout seul; destournant V. M. de prendre croyance en ses autres Ministres, qui est vn sacrilege d'Estar, le plus pernicieux qu'on

puisse imaginer, & de plus perilleuse consequence.

Considerez, Sire, si V. M. peut estre dignement seruite d'un tel hōme, & en quel peril il met vostre Couronne en iouant de tels tours à vos Conseillers, ce qui fait preiuger aux gens de bien son naturel malicieux, & apprehender les inconueniens d'une si malheureuse conduite.

Mais ce n'est pas tout, Sire, il faut approfondir la suite de ses finesse, à quoy luy & son beau peres'occupent plus qu'à ruminer sur vos affaires, tant l'apprehension d'estre recerchez les talonne, & tant ils ont crainte de cheoir dans la fosse qu'ils preparent aux autres.

Voyant qu'il n'estoit assez puissant, ny d'esprit, ny de credit, pour gouverner seul, & pour resister au commencement à l'enuie des grands, il s'est aduisé d'introduire le Cardinal de Richelieu dans vostre Conseil, non pour restablir l'ordre; mais seulement pour desguiser le bolus de casse qu'il a fait aualler au Colonel, & d'un mesme coup animer Mōsieur vostre frere contre la Royne Mere, semant la diuisiō ou l'amour deuroit estre inuiolable.

Il s'est hasté encores de l'introduire

pour se descharger sur luy du mescontentement que le Comte de Soissons auoit de la rupture de son mariage avec Madame, comme aussi pour donner l'endosse audit Cardinal de tous les accrochemens qu'il preuoyoit arriuer dans les negotiations de Hollande & d'Angleterre. Et ce qui est de plus detestable, c'est qu'on assure qu'il fait estat d'entretenir V. M. en continuelle ialousie avec la Royne vostre Mere: mais le public espere, Sire que Dieu versera sō foudre sur ceux qui vsēt de tels artifices? & qu'au rebours il estendra ses saintes benedictions sur ceux qui contribuent à l'vnion de la Mere & du fils.

A toutes ces precieuses intrigues, Sire, V. M. doit couper promptement la racine, si elle desire heureusement regner, & d'un mesme pas aduiser aux resolutions qu'elle doit prendre sur les importants affaires du temps & desordres inueterez de vostre Estat; la conuiuence ny le patelinage n'estans plus de saison, la necessité vous pressant de mettre la main à l'œuvre à bon escient, si avez enuie de preuenir les perils qui menassent vostre Couronne. Autant vous, dit le prouerbe, bien battu que mal battu, faites tant que vous vou-

dre le comp laifant avec la Señora doña Iberia aſſeurez-vous qu'elle ne vous pardonnera iamais, & mettra auſſi peu en conſideration tous les ſignalez plaiſirs que la France luy a fait de l'auoir laiſſé eſtablir dans la Valtoline, à Iuliers, au Palatinat, & par toute l'Allemagne.

Vous traitez avec les Holandois, vous eſcoutez les conſeils de Sauoye & de Veniſe, vous entrez en alliance avec l'Angleterre, vous auez donné retraite à Mansfeld, ſoyez certain, Sire, que lors qu'elle verra ſon ieu qu'elle ne manquera de vous ramenteuoir Catholiquement tous ces pechez mortels, & aurez beau alleguer que vous eſtes meilleur Catholique qu'elle, que vous n'aez point veu Mansfeld, croyez comme aux Saints nouueaux que toutes ces excuſes n'empeſcheront point que ceſte bonne Dame ne veille iour & nuit pour vous prendre ſans verd. C'eſt pourquoy V. M. doit reſoudre hardiment les choſes qui regardent ſa conſeruation, elle doit voir librement Mansfeld, l'employer promptement, maintenir ſes anciens allies, ſans ſ'arreſter aux ſpeculations des Moines, ny du Nonce, leſquels ne preſchent que
l'intereſt

l'intérest du Pape, & non celuy de vostre service.

Mon Dieu, Sire, qu'un certain païsant auoit bonne grace, disant que si chacun ne se mesloit que de son mestier, que les vaches en seroient bien mieux gardees. Ainsi veritablement si Espagne & Italie ne s'entremesloient pas tant dans les affaires de France V.M. en eut esté & seroit beaucoup mieux seruie. Non, non, Sire, il faut que vous terrassiez toutes ces caballes, ou que vous vous refoudiez d'endurer d'oresnauant mille niches & mille affronts de vos voisins.

Sçachez, Sire, que deux choses sont capables d'acheuer de ruiner vos affaires, l'une le descry que les Estrangers font de la mauuaise conduite de la Viennille & de son esprit quinteux; l'autre, l'inueterée caballe de la categorie Espagnole, qui sous le pipeur pretexte de la gloire de Dieu, ont râtost escroulé & infecté ce qui restoit de solide dans vostre Royaume, & qui vous ont engagé astucieusement en une guerre ciuile, à fin que l'Espagnol n'eust point d'empeschement du costé de la France durant ses conquestes d'Allemagne; tant ont eu de force les ressorts

que les Roys Philippes ont tousiours fait iouer pour faciliter leurs entreprises. Et de là vient que les bons François ont remarqué que ce n'est pas d'auourd'huy qu'ils sont en iouissance de couvrir leur malice du voile de la Religion, & de l'autorité du sainct Siege, qu'ils ont de tout temps forcé de seruir à l'accommodement de leurs interests. C'est pourquoy Pasquil rencontra iudicieusement quand il dit que le Pape estoit porte-mâreau du Roy d'Espagne. Or comme la Religion s'est auourd'huy conuertie en vne perilleuse faction, en ce que l'on n'en prend que l'apparence pour produire de mauuais effets, prenez garde, Sire, aux pieges que l'on a tendu à la France sous ceste belle cape Espagnole, & vous souuenez qu'un esprit qui a couru apres le froc, comme celuy du Marquis, n'est pas assez subtil pour garantir vostre Estat contre les astucieuses pratiques d'une telle cabale.

Pour conclusion, Sire, la Voix Publique crie par tout que la Vieuville n'est point assez expert Medecin pour trouuer les remedes salutaires à la guarison des playes de la France. On le tient veritablement pour grand personnage en matiere de ses

inter ests, boutades & intrigues: mais qu'il ait le talent de pouuoir conseiller vn grãd Roy comme V. M. dans les importans affaires du temps present, & de sçauoir la methode necessaire pour desbrouiller nos desordres, ou preuoir nos malheurs, c'est ce qu'on luy desnie tout à plat, d'autant qu'on luy prouuera que ses mathematiques sont aussi mal arengees dans sa teste, que ses conceptions y sont confuses; outre qu'il est impossible qu'un homme qui n'ayme à vous rapporter aucune affaire, qu'il n'aye premierement trouué dedans vn notable interest pour luy, puisse iamais dignement servir le public, ny manier vos affaires comme il faut.

Ceux neantmoins qui veulent honnestement excuser les defauts de la Vieuville disent qu'il a par rencontre des bonnes conceptions par interualle des bonnes humeurs, & par fois des bonnes heures, qui sont neantmoins tous indices d'un esprit fanatique & lunatique. Hé? quoy, Sire, voudriez vous bien cōfier vos affaires à vne ceruelle subiette aux influences de la Lune? On ne peut croire cela de V. M. elle est trop sage pour courre risque d'un tel hazard, elle sçait qu'il ny a point

de plaisir à faillir en matiere de Gouvernemēt. Vn Prince ne peut estre trop preuoyant en telles affaires, les fautes qui s'y commettent par fois en vne heure ne se peuuent bien souuent reparer en cent ans. On peut bien faire des playes en se iouant: mais Sire, elles ne se guarissent iamais qu'auec douleur.

Le Roy de la grand Bretagne a laissé perdre le Palatinat comme par gayeté de cœur, il coustera la vie & la ruine d'un million d'hommes pour le reprendre. Nous auons peu facilement empescher la perte de la Valtoline, Gueffier n'oseroit auoir dit le contraire, & il faut au-iourd'huy remuer toute la Chrestienté pour la recouurer. Et si l'on continuë encore à viure de la sorte, les Regimens de Vardes & de Ioyeuse, ny la compagnie de caualerie du fils du Surintendant, qui n'a pas encore de haut de chausses, ne vous garantiront pas contre les attentats de vos voisins, ny toutes les belles excuses du Marquis ne vous sauueront pas du naufrage.

En vn mot, Sire, vostre Surintendant promettre trop à V. M. pour bien tenir, parler trop pour bien faire? la du Vernet

ayant raison de dire, que tous ces grands
 parlaïres sont petits faiseurs, lesquels se
 plaisent au caquet, ne pouvant payer
 contant leurs hostesses. La Vieuville est
 de ces gens là, Sire, ses effects n'estans
 qu'au babil. On approuve bien qu'il en-
 tretienne de gentilles sornettes les per-
 sonnes auxquelles il refuse finance, ainsi
 que Bassompierre faict de bonne grace
 ceux qui luy demandent de l'argent : car
 on ne scauroit trop honnestement caiot-
 ler telles gens pour les contenter. C'est
 en cest endroit que les trainees de paro-
 les sont bonnes, mais à l'oreille d'un
 grand Roy, elles sont inutiles, voire tres-
 nuisibles. Le Marquis faisoit tous les iours
 perdre plus de temps à l'escouter qu'il
 n'en faudroit à resoudre mille bons affai-
 res pour le service de V. M. Cependant
 il veut tousiours parler, & ne scait par
 ou commencer.

Il y a six mois que toute la France at-
 tend le bon-heur qu'il promet à l'État
 par la reformation qu'il se vante d'y ap-
 porter: neantmoins personne n'a encores
 veu de ses miracles, non plus que ceux de
 Madame Acarie. Tout ce en quoy il a
 bien rencontré, c'est d'aueir estably la Su-

rintendance dans l'Espargne chose qu'ine
s'est iamais veüe en quelque Royaume
que ce soit, de mettre en vne mesme mai-
son deux charges de telles importances
pour le maniment des finances, & d'auoir
mis la France en la garde de Dieu: car ve-
ritablement on peut affermer, Sire, qu'el-
le est abandonnee des hommes estant en-
tre les mains de la Vieuille, la veüe du-
quel est trop courte pour preuoir ce qui
est necessaire au salut pour scauoir reme-
dier au malheureux fatum de ce siecle,
n'estant pas croyable (comme à sceu tres-
bien dire le Pere Guerin) que la Vieuille
ait esté presomptrueux iusqu'à ce point
là, que d'auoir osé pettuader au monde
qu'il n'est pas fou.

De là vient qu'un Pere Recolet grand
Physionomiste, entendant quelques-vns
qui se plaignoient de ce que le Marquis
trompoit tous ceux qui auoient affaire à
luy, il leur remonstra charitablemēt qu'ils
s'abusoient, en ce que tout au contraire la
Vieuille ne pouuoit tromper personne.
Et comme on luy en eust demandé la rai-
son, il ne fit autre responce, sinon qu'il
auoit beau contrefaire l'entendu, que sa
mine le faisoit tousiours recognoistre

pour vn esceruelé ; & que s'il se mesloit plus long temps des affaires , qu'on seoit plus en peine de luy trouuer vne place à S. mathurin qu'à la grande Chartreuse.

Voila, Sire, l'estime qu'on fait de la Vieuille, qui est tenu en effect pour si grand personnage, que le public à ceste croyance que l'Historiographe Bernard ne mettra iamais liure en lumiere, sinon ceux qu'il remplira de la compilation des faits chimériques du Marquis.

C'est, Sire, ce que i'ay recueilly de la Voix Publique sur son suiet , & pour finir ie supplieray tres-humblement V. M. de se faire lire certains vers qui se trouuent dans les vieilles Centuries de Nostradamus imprimee- a Lyon en l'an 1554. desquels ensuit la teneur.

*Quand vn Iudas de Cité vieille yssu
Des vieux Francons gouvernera la bourse
Lors tout Goulois par luy sera desceu
Et maux des lis de là prendront leur source.*

Après cela y pense qui voudra, le Clergé, la Noblesse & toute la France a interest qu'un si capricieux Pilote, tienne le gouuernail du Nauire, ne faisant doute suiuant ceste Prophetie, que ceste vieille Cité ne laisse briser nostre vaisseau au tra-

uers des escueils de la faction Espagnole,
contre laquelle chacun sçait qu'il est trop
mal habile pour no^r en sçauoir desmesler.

Au surplus si Messieurs les Ministres
desirent que le peuple prie Dieu pour le
bon Conseil du Roy, ainsi que tous vrais
subiets y sont obligez, qu'ils se monstrent
plus vigoureux à resister au mal, sinon
que le Cardinal de Richelieu duquel on
espere mirabilia, s'en aille à Rome pour y
gagner les pardons, le Connestable à
Grenoble, le Garde des Sceaux aux Ber-
nards en la place de du Vair, & le Mar-
quis de la Vieuille gardermaizieres, pour
s'y preseruer d'anatheme. Amen.